

EDITORIAL

Pasingkion ang mga paghimakas batuk sa paantus kag traidor nga rehimen Marcos

Padayon nga nagadalum kag nagalala ang pag-antus sang pumuluyong Pilipino tungod sa mga programa kag patakaran sang rehimen Marcos nga kontra-imol, kontra-pumuluyo kag pabor sa mga dalagko nga kapitalistang dumuluong kag mga lokal nila nga ahente, mga agalon mayduta kag burukrata kapitalista.

Nagapagusa ang pamilya Marcos, mga kroni kag alipures sa pondo kag pribilehiyo sang gobyerno, samtang nagausmod ang kabuhi sang mayoriya sang mga Pilipino. Kayod-karabaw ang mga mamumugon kag masang anakbalhas. Tuman ka kulang ang suhol kag sweldo sa atubang sang padayon nga pagtimbuok sang presyo kag mga balayran. Minilyon ang wala sang trabaho. Tuman ka gamay nga kita nga naga-agi lang sa palad sang masang nagaantus. Nagadamo ang nagakapyot sa patalum para lang may maipakaon sa ila mga anak.

Tuman ang pagka-init sang pumuluyo sa rehimen Marcos sa kawadon sang pagkabalaka sa masang lubong sa kapigaduhon, kag sa pagpala-sini sang krisis sa palangabuhian kag pag-antus sang pumuluyo. Nagapabungol-bungol si Marcos sa mala-

pad nga mga panawagan sang pumuluyo. Ginabalewala niya ang singgit sang malapad nga masa para sa makabuhi nga suhol kag sweldo, trabaho, matuod nga reporma sa duta, kinamatarung sa katubigan, pagpadako sang badyet para sa libre nga serbisyo sosyal kag para palaparon ang lokal nga produksyon, kag iban pa nga hinanali nga mga demanda.


Imbes, masako si Marcos sa mga pakuno-kuno nga palagwaon nga wala nagadala sang kasulhayan sa pumuluyo, pareho sang dako nga drama sang pagbalasa sa gabinete (nga tatlo man lang ang gin-ilisan), pagpahambog sang ₱20 kada kilo nga bugas (nga magluwas sa pipila lang ang naga-pulos tempo-raryo pa), libre nga

sakay sa LRT (nga apat ka adlaw lang) kag kon ano-ano pa nga wala sang pulos nga gimik. Para bilugon ang ulo sang pumuluyo, nagapaguwa si Marcos kag iya mga upisyal sang mga estatistika agud tabunan ang padayon nga paglala sang krisis sa ekonomiya, pagsaka sa presyo sang mga balaklon, kag mas nga pagkalubong sa kapigaduhon sang minilyon nga Pilipino.

Tuman ang paglapak sang rehimen Marcos sa kinamatarung kag palangabuhian sang masang anakbalhas. Agud ganyaton ang mga dumuluong kapitalista nga magpangapital, ginalansang ni Marcos ang sweldo sang mga mamumugon agud himuslan ang ila barato nga kusog pangabudlay. Sa kaumhan, ginagamit ni Marcos ang pasista militar agud hatagan sang ligwa ang malaparan nga pagpangagaw sang duta para sa mga plantasyon kag operasyon pagmina, nga nagapalayas sa ginatos ka libo

nga mangunguma kag mga tumandok nga pumuluyo sa ila duta. Gina-gawan sang palangabuhian ang mga mangingisda, mga drayber, kag iban pa nga gagmay nga mga trabahador. Sa ngalan sang pagkinot, plano ni Marcos nga buhinan ang empleyado sang gobyerno nga mas nga magpalain sa serbisyo pangpubliko.

Paantus na sa pumuluyo, padayon pa nga ginabutang ni Marcos sa peligro ang kaluwasan sang pungsod, tungod sa bulag niya nga pagsunod sa mga dikta sang iya imperyalistang



amo nga US. Nagapagamit si Marcos sa Indo-Pacific Strategy sang US para palibutan kag pungan ang pagbaskog sang China. Nagadamo ang mga base militar kag pasilidad sang US sa Pilipinas para mag-istasyon sang linibo ka tropang Amerikano sa lain-lain nga bahin sang pungsod. Ginaganoy ni Marcos ang Pilipinas sa gyera nga gusto nga palukpon sang US, sa wala lang-at nga paghiwat sang mga paghanas kag paghanda sa gyera, kag pag-imbak sang nagadamo nga mga mabaskog nga armas pang-gyera sang US nga gina-target sa karibal sini nga China.

Tungod sa pagpaantus kag pagtraidor sa pumuluyo, mas nga nagakaligwin ang nagahari nga rehimen sa pumuluyong Pilipino. Ginawasiwas ni Marcos ang Memorandum Circular No 83 agud bug-os kabangis nga ipatuman ang pasistang kakugmat agud ipiton ang pagbato sang pumuluyo. Apang indi mapungan ni Marcos ang pagsulong sang militanteng kahublagan masa tungod yara sa likod sini ang linaksa ka pumuluyo nga determinado nga tapuson ang gutom kag pagpangsumpo.

Ginakonsolida ni Marcos ang iya poder sa pagpili sang masobra 200 ka heneral sa AFP kag pagbutang sang mga bag-o nga tinawo sa mga kumpa-

niya nga uyat sang gobyerno, samtang ginatay-og ini sang pangpulitika nga krisis sa atubang sang nagapadayon kag nagasingki nga bunggo-anay sang mga nagasumpunganay nga mga hubon.

Sa handum nga mapabilin sa poder ang ila pamilya, luyag ni Marcos nga lubos nga dugmukon ang mga Duterte agud pungan ang plano sang iya karibal nga magbalik sa poder sa 2028. Apang daw ginahampangan niya ang pumuluyo sa pag-atras-abante sang iya mga alipures sa Senado sa pagbista sa kaso nga *impeachment* kontra kay Vice President Sara Duterte, nagapakita sang pag-aregluhanay sang mga dunot nga reaksyonaryong hubon. Madasig nga nagalapta ang kalayo sang kaakig sang pumuluyo sa mga pagtinguha nga pungan ang pagbista kag pasabton si Sara Duterte sa pagwaldas sang kwarta sang pumuluyo kag iban pa nga mga mabug-at nga kasal-anan sa pumuluyo.

Wala sang ihatag nga kasulhayan ang burukrata kapitalista, pasista kag papet nga rehimen Marcos sa kabuhi sang pumuluyong Pilipino. Sa tunga sang nagatalum nga krisis,wala sang iban nga mapilian ang masa nga nagantus kag pigos kundi ang maghimakas. Ginatulod sang sitwasyon ang mga mamumugon, mangunguma, ma-

la-proletaryado kag iban pa nga pigos nga sahi kag sektor nga maghugpong agud ipakig-away ang ila mga palangabuhian kag mga demokratiko nga kinamatarung, kag ituon ang ila kaakig kag protesta sa rehimen Marcos, sa imperyalismong US kag mga pasistang gaway sini.

Sa mga pabrika, eskwelahan, sa mga komunidad, sa lain-lain nga banwa kag probinsya, tumuron ang mga hinanali nga problema kag demanda sang masa. Base diri, tukuron ang solidong kusog sang masa sa dagway sang mga unyon kag mga asosasyon, kag ipasaka ang ila kamuklatan. Magmartsa ukon magrali agud ipakita ang malaparan nila nga paghiliusa kag palanugon ang ila mga singgit. Pabaskugon ukon tukuron ang mga sanga sang Partido kag mga likom nga rebolusyonaryong organisasyon masa agud magserbe nga salsalon nga taludtod sang malapad nga masa. Ubayan sila sa ila mga paghimakas kag ipasaka ang mga ini sa pakig-away sa nagahari nga rehimen Marcos.

Dapat magpanikasog sa pagpabaskog kag pagpalapad sang Bagong Hukbong Bayan bilang armas sang pumuluyo agud lubos nga tapuson ang sistemang nagapigos kag nagahimulos sa ila. Rekruton ang pinakadamong mga mamumugon, mangunguma, mala-proletaryado, mangingisda, mga petiburges nga intelektwal agud magserbe nga mga Pulang hangaway kag mga kumander sang Bagong Hukbong Bayan.

Sa atubang sang grabe nga kapintas kag brutalidad sang nagahari nga rehimen, malig-on ang panindugan sang BHB nga ipakig-away ang kaayuhan kag kinamatarung sang masa, kag ang ila makatarungan kag pangmalawigon nga handum kag interes. Indi matiulang ni Marcos ang mga rebolusyonaryong pwersa bisan magsuksok pa ini sang maskara sang "kalinong" agud taguon ang pasistang bangkil. Hugot nga uyatan sang mga Pulang hangaway ang ila mga armas. Handa sila nga makig-away para sa pumuluyo tubtob may dugo nga magatagas. Determinado sila nga isulong ang inaway banwa tubtob sa kadalagan.

 Tuig LVI No. 11 Hunyo 7, 2025	
Ang Ang Bayan ginabantala sa lenggwahe nga Pilipino, Bisaya, Iloko, Hiligaynon, Waray, Ingles kag Espanyol. Nagabaton ang Ang Bayan sang mga kontribusyon sa porma sang mga artikulo kag balita. Ginabuyok man ang mga bumalasa nga magpaabot sang mga saway kag rekomendasyon sa ikauwang sang aton pahayagan.	
Kaundan Editorial: Pasingkion ang mga paghimakas batuk sa paantus kag traidor nga rehimen Marcos 1 Ika-4 nga teoritikal nga kumperensya sang NDFP 3 Away sang mamumugon, drayber kag imol 4 Pagpanggamo sang militar sa mga komunidad 5 OP-OD, ginpatigayon 5 Paglagas sang rehimen Trump sa mga imigrante 6 Mga protesta 6 Sa malip-ot nga pulong 7 Pribatisasyon sang CBK Hydroelectric Plant 8 3 ka war games sang US sa Pilipinas, ginhiwat 8 Ka Basavaraju, baganihan sang rebolusyon Indian 9 Operation Gideon's Chariot sang Israel sa Palestine 10	
Ang Ang Bayan ginabantala duha ka beses kada bulan sang Komite Sentral sang Partido Komunista ng Pilipinas	
 ang.bayan@cpp.ph	

Teoritikal nga kumperensya nahanungod sa kumprador kag burukrata kapitalismo

Nagtipon sa Nairobi, Kenya sa Africa sadtong Mayo 23-24 ang 110 ka indibidwal nga nagatiglawas sa 28 ka partido proletaryo-sosyalista, pormasyon kontra-imperyalista, organisasyon sa pagpanalawsaw, kag progresibong kahublagan sang pumuluyo halin sa 20 ka pungsod sa lima ka kontinente para sa isa ka teoritikal nga kumperensya. Sa pagpanguna sang National Democratic Front of the Philippines (NDFP) kag sang Communist Party Marxist Kenya (CPMK), nangin madinalag-on ang kumperensya nga nagtalakay sa burukrata kag kumprador nga kapitalismo sa mga neokolonya.

Ang kumperensya, nga gintig-ulohan Pangkalibutanon nga Kumperensya Teoritikal Nahanungod sa Kumprador kag Burukrata Kapitalismo sa mga Neokolonya, ang ikaapat sa serye sang mga kumperensya nga ginlunsar sang NDFP nga nagatalakay sa malahalón nga hambalanon sa teorya. Ini ang una nga kumperensya nga ginhiwat sa Africa. Gintalakay sa kumperensya ang 21 ka artikulo nga ginsulat sang mga komunista kag proletaryo-sosyalista nga partido kag mga kontra-imperyalista nga organisasyon nga nagapamuno sa kahublagan para sa kahilwayan sa Congo, Cyprus, Guatemala, Indonesia, Iraq, Ireland, Kenya, Kurdistan, Nepal, Pakistan, Palestine, Pilipinas, Sudan, South Sudan, Turkey, Uganda, kag Zambia.

Ang duha ka adlaw nga kumperensya nagserbe nga higayon para mahapag ang Marxista-Leninista nga paganalisa sa nagaluntad nga moda sang produksyon sa lain-lain nga pungsod. Partikular nga ginanalisa diri ang istorikal nga pag-uswag sang mga neokolonya nga sosyedad sa idalum sang kontrol sang imperyalismo.

Ginanalisa sang mga delegado sang kumperensya ang materyal nga ugat sang burukrata kapitalismo kag kapitalismong kumprador, sandig sa mga sinulat ni Lenin kag Mao tuhoy sa mala-kolonyal kag mala-pyudal nga paghari, subongman ang mga padihot kag tikang sang imperyalismong US agud mapabilin ang kontrol sa mga

neokolonya.

Gintun-an man ang papel sang lain-lain nga sahi sa mga neokolonya bilang mga lokal nga ahente sang pagpangkawkaw sa ekonomiya, kag pagsunod-sunod sa pulitika kag militar sa ngalan sang interes sang imperyalismo. Nagpakigbahin ang mga delegado sa madalum nga talakayan para magpadalum kag magbayluhanay sang paganalisa sa mga kondisyon nga nag-anak sang mga istruktura mala-kolonyal kag mala-pyudal nga sosyedad sa ila matag mga pungsod.

Gintalakay man ang mga praktikal nga hambalanon nga may kaang-tanan sa rebolusyonaryong hilikuton kag pagsulong sang mga kahublagan sang pumuluyo, ilabi na sa konteksto sang burukrata kapitalismo. Ginanalisa sang mga tumalambong ang mga estratehiya para sa pag-organisa sang mga partikular nga sahi sang sosyedad, pareho sang mala-proletaryado, kag gintun-an kon paano ginahorma sang nagalala nga pangkalibutanon nga krisis kag nagadalum nga imperyalistang agresyon ang pag-uswag sang mga pwersang rebolusyonaryo, kag sang mas malapad nga kahublagan Makawala sa ila mga pungsod kag rehiyon.

Ang artikulo nga ginpaambit halin sa Pilipinas ginsulat sang Komite Sentral sang Partido Komunista ng Pilipinas. Ginbaybay sang artikulo ang kasaysayan sang pagtuhaw sang kumprador kag burukrata kapitalis-



mo sa pungsod nga resulta sang paghari sang imperyalismong US paagi sa ahente sini sa ekonomiya kag pulitika. Ginpaathag man diri ang papel sang kumprador kag burukrata kapitalista para mapabilin ang mala-kolonyal kag mala-pyudal nga sosyedad Pilipino.

Sa pagtapos sang kumperensya, nagpahayag sang pagpakig-isa ang mga delegado sa ginasaulog nga African Liberation Day sadtong Mayo 25 bilang paghanduraw sa pagtukod sang Organization of African Unity, nga sang ulihi nangin African Union. Gintukod ang OAU agud isulong ang paghiliusa kag pagbuligay sang kontra-kolonyal nga mga kahublagan para sa kahilwayan kag bag-ong tuhaw nga mga independyente nga gobyerno sa 30 ka pungsod African sadtong 1960.

Ginmarkahan nila ini bilang kabahin sang komun nga paghimakas sang ginapigos nga mga pumuluyo batuk sa imperyalismo kag tanan nga mga reaksiyon. Ginpalig-on sang kumperensya ang pagpakig-isa sa mga pwersang kontra-imperyalista kag proletaryo-sosyalista sa nagapadayon nga pagka-signipikante sang mga kahublagan para sa kahilwayan sa Africa nga kabahin sang mas masangkad nga mga paghimakas para sa kaugalingon nga pagbuot kag sosyalismo.

Away sang mga mamumugon, drayber kag imol para sa palangabuhian kag puluy-an

Sa atubang sang nagalala nga krisis sa ekonomiya kag lapnagon nga pagwasa sa pangabuhian sang masang anakbalhas, padayon nga nagatindog ang mga mamumugon kag imol nga taga-syudad. Nagaaway sila paagi sa paglunsar sang mga piket, welga, untat-byahe kag barikada sang pumuluyo.

Welga sa Kawasaki. Nagwelga ang 140 ka mamumugon sang Kawasaki Motors Phils. Corporation (KMPC) sa pagpanguna sang Kawasaki United Labor Union sadtong Mayo 21 tungod sa indi pag-idog sang negosasyon sa *collective bargaining agreement* (CBA) sa tunga sang pamunuan kag unyon. Ginpatindog ang piketlayn sang unyon sa atubang sang hedkwarters sang kumpaniya sa Muntinlupa City. Nagapanawagan sila sang makabuhi nga sweldo, makatarungan nga benepisyo kag pagkilala sang kinamatarung sang mga mamumugon.

Away sang mga drayber sa Lucena City. Halos duha ka bulan na nga nagawelga ang mga drayber kag mamumugon sang FOC Transportation Corporation sa terminal sini sa Barangay Comon, Infanta, Quezon. Ang mga bus nagabyahe sa rota nga Infanta-Lucena City. Ginpalupok ang welga tungod sa pagdingot sa makatarungan nga *separation pay* kag indi pag-atubang sang kumpaniya sa negosasyon. Imbes nga sabton ang reklamo sang mga mamumugon, ginpasakaan sang kaso nga grave coercion kag *illegal strike* ang mga mamumugon sang kumpaniya kag organisador sang pederasyon sang unyon.

₱1,200 makabuhi nga sweldo. Nagpiket ang mga mamumugon halin sa National Capital Region (NCR) sa pagpanguna sang Unity for Wage Increase Now sa Regional Tripartite Wages and Productivity Board-NCR kadungan sang pagpasaka sang petisyon para sa ₱1,200 makabuhi nga sweldo sadtong Mayo 22. Gintuon nila ang hublag kag pagsumite sa ginpatawag

nga konsultasyon sa sweldo sang RTWPB NCR.

Sadtong Hunyo 2, nagpiket ang mga mamumugon sa atubang sang Kongreso agud igiit ang pagpasar sang hagna nga ₱200 dugang-sweldo para sa tanan nga mamumugon sa pungsodnon nga sakop. Duha ka adlaw pagkatapos sini, ginpasar sang Kongreso ang amo nga hagna sa ikatatlo nga pag-hearing. Siling nila, bisan tuman ka layo pa gihapon sang dugang nga ₱200 sa ₱1,200 nga makabuhi nga sweldo, dapat na ini gilayon nga maaprubahan kag pirmahan ni Ferdinand Marcos Jr.

NCAP kag jeepney phaseout, ibasura. Sadtong Hunyo 2, nagkaraban ang Stop NCAP Coalition sa mga mayor nga dalan sa Metro Manila kag nagtipon sa atubang sang opisina sang MMDA sa EDSA-Ortigas agud ipabasura ang No-Contact Apprehension Policy (NCAP). Suno sa koalisyon, ang NCAP ilegal, kontra-imol, kag wala nag-agi sa husto nga proseso. Una na nga ginkwestyon sang mga eksperto sa layi kag grupo sa tawhanon nga kinamatarung ang patakar, ilabi na angot sa basehan pang-konstitusyon kag mga proseso sini.



Nag-untat byahe kag nagprotesta ang mga tsuper kag opereytor sang dyip sa Panay kag Negros para ipabasura ang Public Transportation Modernization Program (PTMP) kag Local Public Transport Route Plan (LPTRP) sadtong Hunyo 5 kag Mayo 30. Kabahin ini sang semana sang protesta nga ginlunsar sang Piston halin Hunyo 2 tubtob Hunyo 6.

Barikada sa Mayhaligue, Tondo. Ginpaslaw sang paghugpong kag barikada sang mga residente sang Mayhaligue Street sa Barangay 262 kag 264 sa Zone 24, Tondo, Manila ang demolisyon nga ginlunsar sang mga pwersa sang estado sadtong Mayo 26. Apat ang ilegal nga ginaresto sang mga pulis sa komprontasyon. Masobra 400 ka pamilya ukon kapin 2,000 ka indibidwal ang mawad-an sang puluy-an sa plano nga demolisyon kag pagpang-angkon sang kumpaniya nga 2288 Ethan Realty Corporation. Temporaryo nga ginpauntat sang isa ka korte sa Manila ang demolisyon sunod sang pag-apin sa petisyon para sa *temporary restraining order* (TRO) sadtong Mayo 27.

Demolisyon sa Davao City. Indi magnubo sa 400 ka pamilya ang napalayas sa ginpatigayon nga demolisyon sang 500 ka tawo nga pwersa nga ginalakipan sang 300 pulis, sa Upper Arroyo, Barangay Matina Crossing, Davao City sadtong Mayo 23. Naglab-ot sa 80 ka balay ang ginguba sa demolisyon kon diin apektado ang 60 ka tigulang kag indi magnubo sa 200 ka bata. Isa ka mando sang korte ang gingamit para patigayunon ang demolisyon apang para lang ini sa pito ka kabalayan sa amo nga distrito. Temporaryo nga napauntat ang demolisyon tungod sa TRO nga nakuha sang mga residente sadtong Mayo 24.

Pagpanggamo sang militar sa mga komunidad, makapatay sa mga sibilyan

Duha ka sibilyan sa Negros ang nareport nga napatay tungod sa pagpanggamo sang militar sa ila mga komunidad sadtong Mayo. Samtang, tayuyon ang pagpang-abuso sang mga soldado sa Albay, Masbate, Bohol kag Metro Manila.

Sa Negros Occidental, nareport nga napatay ang iloy nga si Lolita Roman sa Sityo Toril, Barangay Bandila, Toboso sadtong Mayo 20, tungod sang grabe nga kahadlok kag troma sa mga operasyon sang 79th IB sa lugar. Ginreyd kag ginransak sang mga soldado sang 79th IB ang balay nga ginapanag-iyahan sang pamilya Mahusay kon diin yara ini nga iloy.

Amo man nga insidente ang natabo sa Barangay Minapasok, Calatrava. Gin-atake sang *stroke* ang mangunguma nga si Boyet de Asis sadtong Mayo 23 tungod sa pagpamahog sa iya sang pito ka soldado sang 79th IB kag mga traidor nga sila Marlon Basalo kag alyas Jonel/Mike sa Sityo Kapanuya.

Sadtong Mayo 31, pilit nga ginsulod kag ginransak sang mga soldado sang 79th IB ang balay sang magtiayon nga sanday Alejandro kag Maricel Villamero sa Sityo Manaysay, Barangay Cambayobo, Calatrava. Ginkawat sang mga soldado ang masobra ₱7,000 nga madugay nga gintipon nga kwarta sang magtiayon.

Sa Masbate, ginpaidalum sa mapintas nga interogasyon sang mga soldado sang 96th MICO ang 12 ka sibilyan halin sa Uson, Masbate sadtong katapusan nga semana sang Mayo. Pilit sila nga ginapaako nga may yara sila sang kahilabtanang sa BHB. Naglala ang balatian sang isa sa mga biktima pagkatapos sang intero-

gasyon kag nabudlayan ini nga maghambal pagkatapos atakehon sang balatian sa korason kag diabetes tungod sa kahadlok kag troma.

Sa Negros Oriental, ginkadtuan sang mga soldado ang balay sang mangunguma nga si Alan Garde sa Barangay Sandayao, Guihulngan City sadtong Mayo 15. Pilit nga ginapaako si Garde nga may kahilabtanang kag nagasuporta siya sa BHB. Sa adlaw man nga ini, ginsulod sang mga soldado ang balay ni Rocky Fat kag ginransak sang mga soldado. Ginpagwa sang mga soldado nga may nakumpiskar nga armas halin sa iya kag gintilawan nga dakpon apang nanindugan ang iya pamilya batuk diri.

Halin Mayo 3, ginpaidalum sang 83rd IB sa mala-layi militar nga paghari ang tatlo ka barangay sa Caramoran, Camarines Sur. Ginharas, ginpaandaman kag ginpasibangdan ang mga residente sang komunidad, partikular ang anom ka indibidwal, nga mga himata ukon tagasuporta sang BHB. Ang pila sa mga biktima ginapilit sang militar nga ipaguwa kag "pasungkaon" ang ila mga bana nga ginapasibangdan nga mga Pulang hangaway. Pila ka beses man nga pilit nga ginsulod ang balay sang mga residente kag iligal nga ginkuhaan sila sang litrato sang mga soldado.

Sa Northern Samar, ginpaidalum sa *hamlet* sang AFP ang mga barangay

sa Catubig, Las Navas, Gamay, Mapanas kag Palapag sugod sadtong Hunyo 4. Ginpatuman ini sang militar pagkatapos sang siling engkwentro sang AFP kag BHB sa adlaw nga ini sa Barangay Nagoocan, Catubig. Gindumilian nga magguwa sa baryo ang mga residente bisan pa sa kaugalingon nga ulumhan, katambi nga baryo, ukon sa banwa lang sila magkadto. Antes sini, lapnagon ang pagpamilit sang militar sa mga residente sa banwa sang Palapag nga "pasungkaon" ang ila mga himata nga ginapasibangdan nga hangaway sang BHB.

Pagpang-aresto kag pagpasaka sang himo-himo nga kaso. Ginaresto sa kaso nga *illegal possession of firearms and explosives* kag ginpasibangdan nga katapo sang BHB si "Ruben", 47, trabahante sa konstruksyon kag residente sang Barangay Namantao, Daraga, Albay. Ginabdak siya sang mga elemento sang 31st IB sa iya balay sadtong Mayo 23 kag gindala sa isa ka bakan-te nga balay. Nagpalupok sang pusil ang mga soldado para paggwaon nga may natabo nga engkwentro.

Sa Bohol, nagpalapta sang peke nga balita kag impormasyon ang CIDG sadtong Mayo 23 batuk kay Carmilo Tabada, konsehal sa isa ka barangay sa banwa sang Trinidad. Ginapasibangdan siya nga opisyal sa pinansya sang PKP kag ginasiling nga gin-aresto tungod sa kaso nga "terrorism financing." Ginklaro ni Tabada nga siya mismo ang nagkadto sa korte kag nagpyansa kaangot sa kaso. AB

OP-OD, ginpatigayon sang mga grupong rebolusyonaryo

PILA KA ADLAW antes kag pagkatapos sang reaksyonaryong eleksyon sadtong Mayo 12, nagpatigayon sang operasyon pinta-operasyon dikit (OP-OD) ang lain-lain nga organisasyon nga alyado sang National Democratic Front (NDF) para ibuyagyag ang kagarukan sini. Nagapanguna nga mensahe sa mga OP-OD ang pagpatingkad nga ang rebolusyon ang matuod nga solusyon nga amo ang magadala sang matuod nga pagbag-o sosyal sa pungsod, indi ang reaksyonaryong eleksyon.

Tuman ka kitaon ang elektronikong pagpangdaya kag iban pa nga tipo sang anomaliya agud magpabor sa mga tiglawas sang mga agalon mayduta, burgesya kumprador kag sang imperyalistang US. Mas nga nabuyagyag sang bag-o lang natapos nga eleksyon ang pagkabangkarote kag pagka-peke sang amo nga "demokratiko nga proseso."

Nagpanawagan sila sa pumuluyo nga magkadto sa kaumhan, magpatapo sa

BHB kag isulong ang inaway banwa.

Ginlunsar ang mga aktibidad sang Kabataang Makabayan, Artista at Manunulat ng Sambayanan, Liga ng Agham para sa Bayan, Katipunan ng mga Samahang Manggagawa kag pangrehiyon nga tsapter sang NDF. Ginpatigayon nila ini sa Polytechnic University of the Philippines-Sta. Mesa, University of the Philippines (UP)-Los Baños, UP Manila, sa mga kalye sang Manila, Baguio City, Rizal kag Quezon.

Pag-antus sang mga Pilipino sa paglagas sang rehimen Trump sa mga imigrante

SUGOD SANG LIWAT nagpungko si Donald Trump bilang Presidente sang US sining Enero, wala puas ang lapnagon nga pag-atake, pagpanglagas, pilit kag arbitraryo nga pagpalayas ukon deportasyon sa mga mamumugon nga imigrante sa US. Halin Enero tubtob Mayo naglab-ot na sa masobra sa 271,000 ka mga imigrante ang ginpadeport sang administrasyon samtang indi magnubo sa 49,184 ka imigrante ang subong nakadetine sa lain-lain nga pasilidad sang Immigration and Customs Enforcement (ICE) sa US.

Suno sa embahada sang Pilipinas kag base sa mga kaso nga ginayutan sang Tanggol Migrante, ginabana-bana nga indi magnubo sa 30 ka Pilipino nga imigrante ang nareport nga napadeport subong nga tuig. Indi makuha ang eksakto nga isip sang nakadetine ukon nadeport sang ICE tungod wala ini sang ginabantala nga impormasyon.

Yara sa 150,000–370,000 ang Pilipino nga wala sang dokumento ukon ilegal nga nagapuyo sa US.

Suno sa Bayan USA, indi bastante ang ginahimo nga aksyon sang embahada sang Pilipinas sa US kag mga konsulado sini para sa mga Pilipino nga imigrante nga nabilanggo kag natalana nga paulion. Grabe ang ila pagpatumbaya kag kawad-on sang pagpasilabot sa mga Pilipino nga imigrante nga nagapangita sang bulig. Bisan ang ayuda nga Assistance to the National Fund sang embahada ginadingot sa mga nagakinahanglan.

Sa atubang sang pagpatumbaya sang rehimen US-Marcos, padayon ang pagkampanya kag pag-organisa sang mga organisasyon sa US sa pagpanguna sang Tanggol Migrante, mga alyado nga organisasyon, kag mga Pilipino sa komunidad. Naglunsar sila sang lain-lain nga aktibidad kaangay sang *press conference*, rali, pagbisita sa mga nakadetine, pagpadala sang sulat sa mga hukmanan kag pagkalap sang donasyon para sa gilayon nga paghilway sa mga gin-detine kag pagbulig sa ila mga pamilya.

Tungod sa ululupod nga paghulag sang mga pumuluho sa US, nahimo nila nga mahilway si Michelle (indi matuod nga ngalan) sadtong Abril 30 kag si Lewelyn Dixon sadtong Mayo 29, pareho nga gin-detine sa NorthWest ICE Detention Center (NWDC) sa Tacoma, Washington.

Nakadeten pa gihapon sanday Maximo Londerio, Rodante Rivera, Ligaya Jensen kag Alma Bowman, nga mga residente sang US nga pila na dekada nga nagapuyo diri.

Nagapanawagan naman ang mga demokratikong organisasyon sa US sang gilayon nga aksyon gikan sa gobyerno sang Pilipinas. Siling nila, dapat sini hatagan sang nagakaigo nga suporta ang tanan nga imigrante, lakip ang nagaatubang sa deportasyon, *trafficking* ukon pagpangawat sang sweldo. Nagapanawagan man sila kay Ambassador Jose Manuel Romualdez nga magpanaog na lang sa pwesto kon indi niya masarangan nga tungdan ang iya trabaho nga pagpangapin sa mga Pilipino sa US.



Bistahon si Sara Duterte. Nagprotesta sa Senado sa Pasay City ang mga progresibo nga grupo sadtong Hunyo 3 agud manawagan nga sugdan na ang hungod nga ginpa-atrasar nga pagbista sa kaso nga *impeachment* ni Vice President Sara Duterte. Ginbatikos nila ang pagpa-atrasar gamit ang madamo nga palusot sang Senado agud sugdan ini. Sadtong Pebrero pa nasumite sang House of Representatives ang mga artikulo sang *impeachment*.

Wala-tuo man ang pagbatikos sa Senado tungod sa paglapas sini bisan sa Konstitusyon 1987 tungod sa pagka-atrasar sang pagbista. Isa na diri ang mga propesor sang University of the Philippines College of Law. Samtang, natalana nga maglunsar sang lapnagon nga protesta sa Hunyo 11, adlaw sang pag-hearing sang Senado sa *impeachment*, ang lain-lain nga grupo sa pagpanguna sang Taumbayan Ayaw sa Magnanakaw at Abusado Network Alliance (TAMA NA).

Away, mangingisda. Naglunsar sang *fluvial parade* ukon parada sang mga bangka ang Pamalakaya kag Save Laguna Lake Movement sa Muntinlupa City sadtong Mayo 31, pungsodnon nga adlaw sang mga mangingisda, agud ipanawagan ang pagbasura sa mapangwasak nga Laguna Lake Roadshore Network Project kag 2,000-ektarya nga *floating solar power project* sa Laguna de Bay.

Sadtong Mayo 30, ululupod nga nagmartsa ang pila ka gatos ka mangingisda, mga tagasuporta kag tigtib-ong sang kapalibutan padulong sa Mendiola sa Manila. Nagapanawagan sila sang pagpangapin sa kinamatarung sang mga mangingisda, pagpamatuk sa reklamasyon, kag pagbawi sa pamatbat sang Korte Suprema tuho sa 15-kilometro nga *municipal waters*.

Hustisya para kay Junver. Nagsindi sang mga kandila ang mga estudyante sang University of Santo Tomas sa kampus sini sa Manila sadtong Mayo 29 bilang panawagan sang hustisya sa pagkapatay ni Junver Toledo, 22, pareho nila nga estudyante. Nareport ang pagkapatay ni Toledo, isa ka estudyante sa UST College of Rehabilitation Sciences sadtong Mayo 17 tungod sa presyur sa pag-eskwela.

Hilwayon ang mga bilanggong pulitikal. Naglunsar sang piket-protesta ang Karapatan-National Capital Region sa atubang sang Quezon City Hall of Justice sadtong Mayo 20. Panawagan nila nga gilayon nga hilwayon kag ibasura ang mga kaso nga *illegal possession of firearms and explosives* batuk sa mga unyonista nga sanday Mark Ryan Cruz, Romina Astudillo, kag Jaymie Gregorio, nga kabahin sang Human Rights Day 7. Natalana ang pagbista sa adlaw nga ini apang wala nag-abot ang tighista tungod "nagbakasyon" kuno ini gani ginsaylo ang pagbista sa Agosto.

71 sa 82

probinsya nagapabilin nga kontrolado sang mga **dinastiya sa pulitika** pagkatapos sang 2025 eleksyon, pareho lang sang bag-o ang eleksyon.

3 ka tiglikom

lang ang **ginsipa ni Marcos Jr** sa iya gabinete pagkatapos ang pakuno-kuno nga pagpapahalin niya sa bug-os nga gabinete para sabton kuno ang singgit sang pumuluyo para sa pagbag-o.



ka preska nga isda ang ginpahanugutan nga i-import sa rason nga sirado sa 3 ka bulan halin Hunyo 1 ang *fishing season* sa **Davao Gulf** kag iban pa nga pangisdaan.



ukon tubtob ₱600M/bulan ang napierde sa mga negosyo sa **Tacloban City** samtang ginapatuman ang mga restriksyon sa pagbyahe sang mga dalagko nga trak sa **San Juanico Bridge**.



911

ang kumpirmado nga kaso sang MPox (**monkeypox**) sa Pilipinas halin 2024 tubtob Hunyo 4, 2025. Wala ini nagalapta sa hangin pareho sang Covid-19 kundi paagi sa pag-ipit sa lawas sang isa ka tawo nga may sakit sini, ukon sa mga gamit nga kontaminado.

57/adlaw

ang bag-o nga kaso sang **HIV** sa Pilipinas sadtong Enero-Marso 2025, mas mataas sang 50% sa pareho nga mga bulan sadtong 2024. **Pinakadamo sa mga kaso may edad 15-25.**



1-10

sa pinakataas nga sweldo sa gobyerno sadtong 2024 puro mga upisyal sang **Bangko Sentral ng Pilipinas**; pinakataas nga sweldo ang pinuno sini nga si Eli Remolona nga nagakita sang ₱47.96M kada tuig.

70%

mas mataas ang isip sang mga kaso sang **krimen** nga naimbolbar ang mga **soldado nga Amerikano** sa **South Korea** sadtong 2023 kon ianggid sadtong 2018.



Ginkuhaan: 2024 Justice Yearbook, Ministry of Justice, South Korea

Pribatisasyon sang CBK Hydroelectric Plant, ginpakamalaut

Hugot nga ginabatikos ni Atty. Carlos Zarate, anay tiglawas sang Bayan Muna, ang plano sang rehimen US-Marcos nga isapribado ang Caliraya-Botocan-Kalayaan (CBK) complex. Siling niya, magadulot lang ini sang grabe nga pagmahal sang sukot sa kuryente nga dugang nga palas-anon sang pumuluyo nga naga-salig sa serbisyo.

"Ang gobyerno dapat ang may kontrol sa mga nagapanguna nga serbisyo pareho sang kuryente. Imbes nga ibaligya ang CBK, dapat ini nga himuon nga modelo sang *renewable energy* nga magpanubo sang sukot sa kuryente para sa tanan," dugang ni Zarate.

Natalana ang pribatisasyon sang CBK complex sa katapusan sang Hunyo subong nga tuig. Suno sa Department of Finance (DOF) pwede mag-ganar ang gobyerno sang ₱50 bilyon (\$897.99 milyon) tubtob ₱100 bilyon halin sa pagpribatisa sang pasilidad.

Ang 728 *megawatt* (MW) Caliraya-Botocan-Kalayaan *hydropower complex* ang bugtong nga nagagana nga hydroelectric facility nga ginapanag-iyahan sang Pilipinas. Ini man ang pinakadaan nga *hydropower plant* sa pungsod.

Ginabug-os ang CBK complex sang Botocan hydro electric power plant (HEPP) nga gintukod sadtong 1939 nga may 20.8 MW nga kapasidad, sang Caliraya HEPP nga gintukod sadtong 1942 nga may kapasidad nga 22MW, kag ang Kalayaan *pump storage power plant* nga gintukod sadtong 1983. Nagatindog ang mga planta sa mga barangay sa Kalayaan, Lumban kag Majayjay sa Laguna.

Ang complex una nga ginpauswag sa idalum sang National Power Corporation (NAPOCOR). Sadtong Pebrero 7, 2001, opisyal nga ginadumalahan sang CBK Power Company Limited ang pagdumala sa CBK complex sa idalum sang Built-Rehabilitate-Operate-Transfer scheme sang gobyerno sang Pilipinas paagi sa NAPOCOR nga magatapos pagkatapos sang 25 ka tuig.

Sadtong Abril 2005, nakuha halin sa orihinal nga tag-iyang ang CBK BROT Agreement sang duha ka Japanese nga kumpaniya—ang Electric Power Development Co., Ltd (J-Power) kag Sumitomo Corporation. Matapos ang kontrata sini sa Pebrero 2026.

Ang CBK complex isa sa tatlo nga nabilin nga dalagko nga planta sang kuryente nga ginapanag-iyahan sang gobyerno. Ginpaidalum ang mga ini sa Power Sector Assets and Liabilities Management Corporation (PSALM) para sa pribatisasyon sang mga pasilidad. Ang duha pa nga natalana naman nga ibaligya amo ang 932MW Agus-Pulangui *hydropower complex* sa Mindanao grid; kag ang 210MW Mindanao *coal plant*. AB

3 war games, dululungan nga ginhiwat sang US sa Pilipinass

HAYAGAN NGA PAGTAPAK sa sobereniya sang Pilipinas ang presensya sang linibo ka soldadong Amerikano, Australian kag iban pa nga dumuluong nga tropa sa teritoryo sang pungsod para sa pagpangsulsol kag mga dalagko nga mga *war games*. Halin Mayo, tatlo diri ang dululungan nga ginlunsar sang US, isa paagi sa kaupod sini nga hukbo sang Australia. Ang mga ini amo ang Kamandag (Mayo 26-Hunyo 6), Kasangga (Mayo 19-Hunyo 24) kag Salaknib 2025 Phase 2 (Mayo 19-Hulyo 20).

Ginlunsar ang Kamandag sa Batanes; sa Capas, Tarlac kon diin ginahiwat ang *live-fire drills* kag sa Burgos, Ilocos Norte kon diin ginalunsar ang isa ka *maritime strike operation*. May yara man mga aktibidad sa Palawan kag iban pa nga bahin sang Luzon kag sa Tawi-tawi sa Mindanao.

Gingamit sang mga tropa sang US kag Pilipinas ang Navy-Marine Expeditionary Ship Interdiction System (NMESIS) kag High Mobility Artillery Rocket System ukon HIMARS sa Kamandag. Ang NMESIS isa ka sistema sang misayl nga *anti-ship* ukon pagpalupok sang barko. Ginakarga ini sa isa ka *unmanned ground vehicle* (dako nga trak) nga ginatawag nga ROGUE Fires Carrier kag may karga nga Naval Strike Missile (NSM).

Nagpakigbahin sa *war games* ang 2,031 ka soldado sang US Marine Corp kag 2,028 ka pwersa nga halin sa Pilipinas. May yara man mga tinawo militar halin sa South Korea, Japan kag United Kingdom nga nagpakigbahin sa *war games*. Nagaserbe naman nga "obserber" ang mga tinawo halin sa France, Canada, Bahrain, Australia, Indonesia, Thailand kag Netherlands.

Ang Kasangga ginbuksan sa kampo sang 4th ID sa Cagayan de Oro City kag ginpatigayon sa Camp Kibartan, Kalilangan, Bukidnon. Indi magnubo sa 90 ka soldado halin sa Australian Army kag 140 ka soldado sang Philippine Army ang nagpakigbahin sa *war games*. Magadugay tubtob Hunyo 24 ang Kasangga.

Samtang, ang Salaknib sang US kag Pilipinas ginlunsar subong sa Northern Luzon.

Ang mga *war games* nga ini ginalunsar sa pungsod para hugton sang US ang kontrol sini sa AFP, suno sa Partido Komunista ng Pilipinas (PKP).

"Nagapamatuk ang pumuluyong Pilipino sa mga *war games* nga ini. Dugang sa ginadala sini nga peligro sa mga Pilipino, peste pa ini sa residente nga ginadingutan sang palangabuhian para hatagan ligwa ang mga paghahas," suno kay Marco Valbuena, pinuno nga opisyal sa impormasyon sang PKP.

Ang madamuan kag dasok nga *war games* kag ang pagpaido-ido sang AFP kag sang rehimen Marcos ang rason kon nga-a ginakabig sang madamo nga pungsod sa Asia ang Pilipinas bilang *proxy* sang US, suno sa PKP. Indi bulag ang mga kaiping nga pungsod sa Asia sa pagka sunod-sunoran ni Marcos kag mga heneral sini sa direksyon kag plano sang US.

Kaupod Basavaraju, baganihan sang rebolusyon Indian kag pangkalibutanon nga proletaryo

Nagahatag sang pagsaludo ang Partido Komunista ng Pilipinas (PKP) kay Kaupod Basavaraju (Nambala Keshava Rao), sekretaryo heneral sang Communist Party of India (Maoist), nga namartir kaupod ang 27 ka iban pa sadtong Mayo 21. Ginpatay sila sang mga pwersa sang estado sa India sa ginatawag nga Masaker sa Gundekote, sa Abhujmad sa distrito sang Narayanpur sa Chhattisgarh, India.

Nagasilak subong ang ngalan ni Kaupod Basavaraju sa kubay sang mga imortal nga baganihan sa epiko nga inaway banwa sa India kag sang mga rebolusyonaryong paghimakas para sa pungsodnon nga kahilwayan kag sosyalismo sa bug-os nga kalibutan. Gin-uyatan niya ang solo sang armadong paghimakas sa India kag nagserbe nga iwag sa banas sang pangkalibutanon nga rebolusyon proletaryo, ilabina sa mga nagligad nga dekada sang mga kapaslawan kag pagkapierte sang mga pwersang sosyalista sa lain-lain nga bahin sang kalibutan.

Sin-o si Kaupod Basavaraju?

Nabun-ag si Kaupod Basavaraju sadtong 1955 sa pamilya sang mga mangunguma sa komunidad sang Jiyannapetta sa distrito sang Srikakulam, Andhra Pradesh nga yara sa sursidlanan sang India. Nag-eskwela siya sang elementarya kag hayskul sa ila distrito kag nagkadto sa syudad sang Warangal sa katambi nga estado sang Telangana para mag-eskwela sang inhenyero sa kolehiyo.

Samtang yara sa kolehiyo, napukaw siya sa kahimtangan kag paghimakas sang pumuluyong Indian rason para magpakigbahin siya sa kahublagan estudyante. Sadtong dekada 1980, nangin kabahin kag nagtungod siya sang yabe nga katungdanan sa CPI (Marxist-Leninist) People's War. Nangin katapo siya sang komite sentral sang Partido sadtong 1992.

Sadtong 2004, kalakip siya sa mga nagpanguna sa pag-isa sang CPI (ML) People's War kag sang Maoist Communist Centre of India (MCCI) para tukuron ang CPI (Maoist). Isa siya sa mga nagtukod sang hukbo

sang banwa sang India nga People's Liberation Guerilla Army (PLGA) sadtong 2000. Ginpamunuan niya ini sa malawig nga panahon kag nagpanguna sa madamo nga kadalag-an sa pagtukod sang mga rebolusyonaryong base kag paglunsar sang mga taktikal nga opensiba batuk sa mga pwersang pasista.


Nagserbe siya nga katapo sang Komite Sentral sa sulod sang 33 ka tuig kag sang Politburo sa sulod sang 25 ka tuig. Ginpamunuan niya sa malawig nga panahon ang Sentral nga Komisyong Militar sang CPI (Maoist). Sadtong ulihi nga bahin sang 2018, ginpili siya sang Komite Sentral bilang heneral nga sekretaryo sang CPI (Maoist) kag nagbulos sa pagpamuno ni Kaupod Ganapathy.

Panawagan para sa hustisya

Hustisya ang ululupod nga singitan sang pumuluyong Indian kag mga internasyunal nga partido kag organisasyon sa pagpatay kay Kaupod Basavaraju kag 27 ka iban pa nga mga kaupod. Nalista sa Masaker sa Gundekote ang mga paglapas sa internasyunal nga makatawo nga la-ya kag mga pagsulundan sa gyera.

Suno sa report sang Dandakaran-ya Special Zonal Committee sang CPI (Maoist), ang 27 ka mga kaupod nga mga katapo sang CPI (Maoist) kag hangaway sang PLGA napatay sa pagkubkob sang linibo ka militar kag pulis sang reaksyonaryong estado sa ila kampo. Ginbuyagyag sang komite nga pagkatapos sang mga inaway buhi nga nadakop si Kaupod Basavaraju kag hungod nga ginpatay sang mga berdugo nga tinawo sang rehimen Modi.

Ang brutal nga Masaker sa Gundekote kabahin sang teroristang



kampanya nga Operation Kagaar. Ginsugdan ang operasyon sadtong Enero 2024 kon diin naggamit sang linibo ka armadong pwersa ang reaksyonaryong estado, nagtukod sang ginatos ka mga detatsment militar kag nagpatuman sang kampanya sang pagpatay kag terorismo batuk mayor sa mga Adivasi, ukon tumandok sang India.

Sa subong, ginaduso sang lain-lain nga demokratikong organisasyon sa India ang imbestigasyon sa Masaker sa Gundekote. Gusto nila nga pasabton ang rehimen Modi kag mga opisyal militar sini sa grabe nga mga krimen.

Samtang, ginpahayag sang Komite Sentral sang PKP ang lubos nga pagsalig sa Komite Sentral sang CPI (Maoist) nga gilayon ini magpili sang isa ka pinuno nga kapareho ang pagkasampaton kay Kaupod Basavaraju agud akuon ang gin-uyatan niya nga mga responsibilidad. Siling sang pamunuan, kumpyansa ini nga sa pagisa sang kinaalam sang mga tigulang nga kadre kag sang kapagsik kag kaalam sang mga huben nga kadre, mapangibabawan sang CPI (Maoist) ang tanan nga pagtilaw, magpadayon sa banas sang rebolusyonaryong armadong paghimakas, kag makaa-gum sang labi pa nga kadalag-an sa inaway banwa sa India.

Operation Gideon's Chariots, pamatay nga halit sang Israel kag US sa minilyon nga Palestino

Sa una nga 24 ka oras sang madugo nga kampanya nga Operation Gideon's Chariots sang US kag Israel, 144 gilayon ka Palestino ang napatay sa mga bomba kag pag-atake sang tropa sini sa Gaza. Sa sunod nga adlaw, asod-asod nga gin-atake sang mga pwersang Israel ang mga bakwitan kag nabilin nga mga ospital kag eskwelahan para tabugon ang mga Palestino padulong sa mga prisohan nga gin-andam para sa ila. Ginatos sa mga napatay mga bata.

Ang Operation Gideon's Chariot, nga ginsugdan sadtong Mayo 18, ang pamatay nga halit sang Israel kag US sa subong 18 ka bulan na nga henosidyo kag 77 ka tuig nga brutal nga okupasyon sini sa mga teritoryo sang Palestine. Katuyuan sini nga direkta nga sakupon ang bug-os nga Gaza kag prisohon ang may 1.5 milyon ka Palestino sa "sentro sang ebakwasyon" sa bahin sang sur sang engklabo.

Halin Oktobre 2023, naglab-ot sa 63,000 ka Palestino ang direkta nga ginpatay kag 118,300 ang napi-lasan sang pagpangbomba kag pag-pangsalakay sang Israel. Kapin katunga sang mga biktima mga bata kag kababaenhan. Ginabana-bana nga ginatos ka libo pa ang napatay tungod sa gutom, balatian kag kakulangan sang pasilidad medikal. Madamo man ang natabunan na lang sang nagkalarumpag nga mga biling kag balay, nga wala makita ukon nakalkal tungod sa wala puas nga pagpangsalakay sang Israel.

Paggamit sa pagkaon kag ayuda bilang armas kag negosyo

Naglab-ot sa lebel-kalamidad ang pagkagutom sa Gaza ilabina halin Marso kon diin absoluto nga gindumilian sang Israel ang pagsulod sang tanan nga klase sang ayuda. Sadtong Mayo, ginhatag sini ang responsibilidad sang pagpanagtag sang pagkaon sa Gaza sa Humanitarian Foundation (GHF), isa ka pribado nga kumpaniya nga magkabulig nga gintukod sang US kag Israel para "lutoson" ang Hamas.

Hugot nga ginbatikos sang United Nations ang paggamit sang Israel sa GHF, nga siling taliw-as sa

dapat pagka-nyutral, imparsyal kag independyente sang makatawo nga hilikuton. Ginkundenar sang UN kag sang madamo nga pungsod kag internasyunal nga institusyon, ang paggamit sang Israel kag US sang ayuda kag pagkaon bilang armas batuk sa mga sibilyan.

Magluwas sa GHF, ginpasulod man sang Israel ang iban pa nga pribado nga kumpaniya nga Amerikano para mag-akto nga "pwersang pang-seguridad" sa mga sentro sang distribusyon sini. Lakip diri ang Safe Reach Solutions, UG Solutions kag S.R.S. Security Firm, nga tanan ginapanag-iyahan sang mga anay heneral sang US Army kag Central Intelligence Agency. Ang pagpili sa mga kumpaniya nga ini ginhimo sang pinakamataas nga opisyal sang Israel, kabulig ang US, nga wala nag-agi bisan sa ila matag-parlyamento kag kongreso.

Tayuyon nga pangkalibutanon nga protesta

Minilyon ka pumuluyo sa bug-os nga kalibutan ang naghiliusa nga nagprotesta batuk sa panibag-o nga bugso sang henosidyo sa Gaza. Panawagan nila ang gilayon kag permanente nga untat-lupok sa Gaza kag pag-untat sang brutal nga pagpang-atake kag pagpangbomba sang Zionistang Israel. Gintuon ang mga protesta sa pagdumdum sa ika-77 nga anibersaryo sang Nakba ukon Ang Kalamidad, ang una nga higayon sang mapintas nga ginpalayas sang mga Zionista ang mga Palestino gikan sa ila mga duta agud itukod ang estado sang Israel.

Ginatos ka mga hublag ang ginpatigayon sa mga syudad sa Middle East, Europe, Asia, Africa kag bisan



sa sulod sang US. Madamo nga paman-on estudyante sa US ang nagpangahas nga maglunsar sang mga protesta kag diskusyon sa mga unibersidad sa tunga sang grabe nga pagpang-ipit sa ila.

Sa Pilipinas, nagpakig-isa ang Moro-Christian Peoples Alliance (MCPA) sa pangkalibutanon nga panawagan sang gilayon kag permanente nga untat-lupok sa Gaza.

Suno kay Amirah Lidasan, sekretaryo heneral sang MCPA, "sugod sang nauntat ang untat-lupok, ang Zionista nga Israel kag ang numero uno sini nga tigpondo wala sang ginpakita nga kaluoy sa mga utod nga Palestino."

Nagapanawagan siya sa internasyunal nga komunidad nga padayon nga engganyuhon ang ila mga lider nga maghimo sang aksyon batuk sa wala-untat nga pagpang-atake sang Israel. "Ang paghilway sang isa kahilwayan sang tanan, ilabina subong sa atubang sang grabe nga paglapas sa tawhanon nga kinamatarung, indi kita dapat mag-untat tubtob indi mahilway ang Palestine," siling niya.

Sadtong Mayo 23, nagpatigayon ang grupo sang porum kag martsa sa University of the Philippines-Diliman. Nagsanto ini sa ika-8 nga anibersaryo sang pagpatuman ni Rodrigo Duterte sang layi militar sa Mindanao kag pagdugmok sa Marawi City, ang bugtong nga syudad nga Islam sa pungsod, sadtong 2017. **AB**